

南
齊
書

六



志第八

南齊書

臣蕭子顯撰

百官

建官設職興自炎昊方乎隆周之冊表乎盛漢之書存改回沈備於歷代先賢往學以之雕篆者衆矣若夫胡廣舊儀事惟簡撮應劭官典殆無遺恨王朗奏議屬霸國之初基陳矯增曹由軍事而補闕今則有魏氏官儀魚豢中外官也山濤以意辯人不荀勗欲去事煩唯

論并省定制成文本之晉今後代承業案爲前
准肇域官品區別階 蔚宗選簿梗槩欽明階
次詳悉虞通劉寅因荀氏之作矯舊增新今古
相校齊受宋禪事遵常典既有司存無所偏廢
其餘散在史注多已筌拾覽者易知不重述也
諸臺府郎令史職吏以下具
見長水校尉王珪之職儀

國相

蕭曹以來爲人臣極位宋孝建用南
譙王義宣至齊不用人以爲贈不

列官

太宰

宋大明用江夏王義恭以後無人齊
以爲贈

太傅

太師太保太傅周舊官漢末董卓爲
太師晉惠帝初衛瓘爲太保自後無
太師而太保爲贈齊唯置太傅

大司馬

大將軍

宋元嘉用彭城王義康後無人齊以
爲贈

太尉

司徒

司空

三公舊爲通官司徒府領天下州郡
名數戶口簿籍雖無常置左右長史
左西掾屬主簿祭酒令史以下晉世

王導爲司徒右長史于寶撰立官府
職儀已具

特進

位從公

諸開府儀同三司

驃騎將軍

車騎將軍

衛將軍

鎮軍將軍

中軍將軍

撫軍將軍

四征將軍

東西
南北

四鎮將軍

凡諸將軍加大字位從公開府儀同如
公凡公督府置佐長史司馬各一人諮
議參軍二人諸曹有錄事記室戶曹倉
曹中直兵外兵騎兵長流賊曹城局法
曹田曹水曹鎧曹集曹有十八曹局

曹以上署正參軍法曹以下署行參軍
各一人其行參軍無署者為長兼負其
府佐史則從事中郎二人倉曹掾戶曹
屬東西閤祭酒各一人主簿舍人御屬
二人加崇者則左右長史四人中郎掾屬
並增數其未及開府則置府亦有佐史
其數有减小府無長流置禁防參軍

四安將軍

四平將軍

左右前後將軍

征虜將軍

四中郎將

晉世荀美王胡之並居此官宋齊以來唯處諸王素族無爲者

冠軍將軍

輔國將軍

寧朔將軍

寧遠將軍

龍驤將軍

凡諸小號亦有置府者

太常

府置丞一人五官功曹主簿九府九史皆然領官如左

博士謂之太學博士

國子祭酒一人博士二人助教十人

建元四年有司奏置國學祭酒准諸曹尚書博士准中書郎助教淮南臺

御史選經學爲先若其人難備給事中以還明經者以本位領其下典學二人三品准太常主簿戶曹儀曹各二人五品白簿治禮吏八人六品保學醫二人威儀二人其夏國諱廢學有司奏省助教以下永明三年立學尚書令王儉領祭酒八年國子博士何胤單爲祭酒疑所服陸澄等皆不能據遂以玄服臨試月餘日博議定

乃服朱衣

總明觀祭酒一人

右太始六年以國學廢初置總明觀
玄儒文史四科科置學士各十人正
令史一人書令史二人幹一人門吏
一人典觀吏二人建元中掌治五禮
永明三年國學建省

太廟令一人丞一人

明堂令一人丞一人

五十七
太祝令一人丞一人
太史令一人丞一人
廩犧令一人丞一人

置令丞以下皆有職吏

太樂令一人丞一人

諸陵令

永明末置用二品三品勲置主簿戶
曹各一人六品保舉

光祿勲

府置丞一人領官如左

左右光祿大夫

位從公開府置佐史如公

光祿大夫

皆銀章青綬詔加金章紫綬者爲金紫
光祿大夫樂安任遐爲光祿就王晏乞
一片金晏乃啓轉爲金紫不行

太中大夫

中散大夫

諸大夫官皆處舊齒老年重者加親信
二十人

衛尉

府置丞一人掌宮城管籥張衡西京賦
曰衛尉八屯警夜巡晝宮城諸却敵樓
上本施鼓持夜者以應更唱太祖以鼓
多驚眠改以鐵磬云

廷尉

府置丞一人正一人監一人評一人

律博士一人

大司農

府置丞一人領官如左

太倉令一人丞一人

導官令一人丞一人

藉田令一人丞一人

少府

府置丞一人領官如左

左右尚方令各一人丞一人

鍛署丞一人

永明三年省
四年復置

御府令一人丞一人

東冶令一人丞一人

南冶令一人丞一人

平准令一人丞一人

上林令一人丞一人

亦屬尚書
殿中曹

將作大匠

太僕

大鴻臚

三卿不常置將作掌官廟主未太僕
掌郊禮執轡鴻臚掌導護贊拜有
事權置兼官畢乃省

乘黃令一人

掌五輅安車大行凶器輶輅車

客館令

掌四方賓客

宣德衛尉少府太僕

鬱林王立文安太后即尊號以官名

南齊書卷八
九
置之

大長秋

鬱林立皇后置

錄尚書

尚書令

惣領尚書臺二十曹爲內臺主行遇
諸王以下皆禁駐左右僕射分道無
令左僕射爲臺主與令同

左僕射

領殿中主客二曹事諸曹郊廟園陵
車駕行幸朝儀臺內非違文官舉補
滿敘疾假事其諸吉慶瑞應衆賀災
異賊發衆變臨軒崇拜改號格制莅
官銓選凡諸除署功論封爵貶黜八
議疑讞通關案則左僕射主右僕射
次經維是黃案左僕射右僕射署朱
符見字經都丞竟右僕射橫畫成目
左僕射畫令畫右官闕則以次并畫若

無左右則直置僕射在其中間揔左

右事

吏部尚書

領吏部刪定三公比部四曹

度支尚書

領度支金部倉部起部四曹

左民尚書

領左民駕部二曹

都官尚書

領都官水部庫部功論四曹

五兵尚書

領中兵外兵二曹

祠部尚書

右僕射通職不俱置

起部尚書

興立宮廟雖置事畢省

左丞一人

掌宗廟郊祠吉慶瑞應災異祚

格制諸案彈選用除置吏補滿除遣
注職

右丞一人

掌兵士百二補役死叛考代年老疾
病解遣其內外諸庫藏穀帛刑器創
業爭訟田地船乘稟拘兵工死叛考
別討補差分百役兵器諸營署人領
州郡租布人民戶移徙州郡縣併帖
城邑民戶割屬刺史二千石令長尉

被收及免贈文武諸犯削官事白案
右丞上署左丞次署黃案左丞上署
諸立格制及詳讞大事宗廟朝廷儀
體左丞上署右丞次署自令僕以下
五尚書八座二十曹各置郎中令史
以下又置都令史分領之僕射掌朝
軌尚書掌讞奏都丞任碎在彈違諸曹
緣常及外詳讞事應須命議相值者皆
郎先立意應奏黃案及關事以立意

官爲議主凡辭訴有漫命者曹緣諮
如舊若命有諮則以立意者爲議主

武庫令一人

屬庫部

車將令一人丞一人

屬駕部

公車令一人

大官令一人丞一人

大醫令一人丞一人

內外殿中監各一人

內外驛驢廐丞各一人

材官將軍一人司馬一人

屬起部亦屬領軍

侍中祭酒

高功者稱之

侍中

漢世爲親近之職魏晉選用稍增華重而大意不異宋文帝元嘉中王華王曇首殷景仁等並爲侍中情在親

密與帝接膝共語貂拂帝手拔貂置
案上語畢復手挿之孝武時侍中何
偃南郊陪乘鑾輅過白門閭偃將匐
帝乃接之曰朕乃陪卿齊世朝會多
以美姿容者兼官永元三年東昏南
郊不欲親朝士以主璽陪乘前代未
嘗有也侍中呼爲門下亦置令史領
宮如左

給事黃門侍郎

亦管知詔令世呼爲小門下

散騎常侍通直散騎常侍負外散騎侍郎
舊與侍中通官其通直負外用衰老
人士故其官漸替宋大明雖華選比
侍中而人情久習終不見重尋復如初
散騎侍郎通直散騎侍郎負外散騎侍郎
給事中

奉朝請

駙馬都尉

集書省職置正書令史朝散用衣冠
之餘人數猥積永明中奉朝請至六
百餘人

中書監一人令一人侍郎四人通事舍人無貲
中書省職置主書令史正書以下

祕書監一人丞一人郎著作佐郎

晉祕書閣有令史掌衆書見晉令令
亦置令史正書及弟子皆典教書畫
御史中丞一人

晉江左中丞司隸分督百僚傳咸所
云行馬内外是也今中丞則職無不
察專道而行騶輻楮苛加以聲色武
將相逢輒致侵犯若有鹵簿至相毆
擊宋孝建二年制中丞與尚書令分
道雖丞郎下朝相值亦得斷之餘内
外衆官皆受停駐

治書侍御史二人

侍御史十人

蘭臺置諸曹內外督令以下

謁者僕射一人

謁者十人

謁者臺掌朝覲賓饗

領軍將軍中領軍

護軍將軍中護軍

凡爲中小輕同一官也諸爲將軍官
皆敬領護諸王爲將軍道相逢則領
護讓道置長史司馬五官功曹主簿

左右二衛將軍

驍騎將軍

游擊將軍

晉世以來謂領護至驍游爲六軍二
衛置司馬次官功曹主簿以下

左右二中郎將

前軍將軍後軍將軍左軍將軍右軍將軍號

四軍

屯騎步兵射聲越騎長水五校尉

虎賁中郎將

冗從僕射

羽林監

積射將軍

彊弩將軍

殿中將軍
負外殿中將軍

殿中司馬督

武衛將軍

武騎常侍

自二衛四軍五校已下謂之西省而散騎爲東省

丹陽尹

位次九卿下

太子太傅

少傅

府置丞功曹五官主簿

太子詹事

府置丞一人以下

太子率更令

太子家令

置丞

太子僕

太子門大夫

太子中庶子

太子中舍人

太子洗馬

太子舍人

太子左右衛率各一

太子翊軍步兵屯騎三校尉

太子旅賁中郎將一人

太子左右積弩將軍

太子殿中將軍負外殿中將軍

太子倉官令

太子常從虎賁督

右東宮職僚

州牧刺史

魏晉世州牧隆重刺史任重者爲使
持節都督輕者爲持節督起漢從帝
時御史中丞馮赦討九江賊督揚徐
二州軍事而何徐宋志云起魏武遣
諸州將督軍王珪之職儀云起光武
並非也晉太康中都督知軍事刺史
治民各用人惠帝末乃并任非要州
則單爲刺史州朝置別駕治中議曹
文學祭酒諸曹部從事史

護南蠻校尉

府置佐史隸荊州晉宋末省建元元年復置三年省延興元年置建武省

護三巴校尉

宋置建元二年改爲刺史

寧蠻校尉

府亦置佐史隸雍州

平蠻校尉

永明三年置隸益州

鎮蠻校尉

隸寧州

護西戎校尉

護羌校尉

右四校尉亦置四夷

平越中郎將

府置佐史隸廣州

郡太守內史

縣令相

郡縣爲國者爲內史相

鎮蠻護軍

安遠護軍

晉世雜號多爲郡領之

諸王師友文學各一人

國官郎中令中尉太農爲三卿左右常侍侍郎
上軍中軍下軍三軍典書典祠學官典衛四令
食官廩牧長謁者以下公侯置郎中令一卿
贊曰百司分置惟皇命職雲師鳥紀各有其式

志第八

南齊書十六

志第九

南齊書十七

臣蕭子顯撰

輿服

晉三皇乘祗車出谷口夏氏以奚仲爲車正殷有瑞車山車垂句是也周禮匠人爲輿以象天地漢武天漢四年朝諸侯甘泉宮定輿服制班于天下光武建武十三年得公孫述葆車輿輦始具蔡邕創立此志馬彪勒成漢興晉摯虞治禮亦議五輅制度江左之始車服多闕但有金

戎省充庭之儀太興中太子臨學無高蓋車元
帝詔乘安車元明時屬車唯九乘永和中石虎
死後舊工人奔叛歸國稍造車輿太元中苻堅
敗後又得僞車輦於是屬車增爲十二乘義熙
中宋武平關洛得姚興僞車輦宋大明改脩輦
輅妙盡時華始備僞氏復設充庭之制永明中
更增藻飾盛於前矣案周禮以檢漢志名器不
同晉宋改革稍與世異今記時事而已

玉輅

漢金根也

漆畫輪

金塗縱容後路受福輅

兩廂上望板前

優遊

通緣金塗鏤鏤碧紋劉鑿鏤金薄帖兩廂外織成衣兩廂裏上施金塗鏤面釘瑇瑁帖望

板廂上金薄帖金博山登仙紐松精優遊上和鸞鳥立花扶街鈴銀帶瑇瑁筒瓦金塗鏤鏤刀格織成手臣金花細錦衣優遊下隱膝裏施金塗鏤面釘織成文優遊橫前施瑇瑁帖金塗花釘優遊前金塗倒龍後捐鑿銀瑇瑁龜甲金塗花沓望板金塗

龍汗板

受福望龍諸校飾抗及諸末皆螭龍首在車前銀帶花獸金塗受福緣裏邊鏤鏤瑇瑁織成衣裏金塗鏤面花釘外金塗博山辟邪虎鳳皇銜花

諸校

斗蓋

金塗鏤鏤二十八瓜支子花黃錦斗衣復碧綃染布綠油頂絳系終織成顏毛

赭舌孔雀毛復錦綠絞隨陰懸珠蚌佩一轅漆畫金塗鈴雲朱結仙人綬准色真孔雀毛

車衡

銀花帶衡上金塗博山四和鸞鳥立花扶街鈴所謂鸞鳥立衡也又龍首銜軛叉髦插翟

尾上下花沓絳綠系的望繩八枚

旒十二

龍畫升龍竿首金塗榮

戰織成衣金塗脊駐及漆案立牀在車中錦複黃紋為案立衣

錦複黃絞鄣泥八幅長九尺緣紅錦

五輅江左相承駕四馬左右駢為六施絳系游

御繩其重轂貳轄飛絡幡用赤油令有紫真毛左肅置左駢馬輓上

金鍍金加冠狀如三方釳鐵廣數十有三繁纓

金塗紫皮紫真鏤錫刻金為馬皆如古制世祖永

明初加玉輅為重蓋又作麒麟頭采畫以馬首

戴之竟陵王子良啓曰臣聞車旗有章載自前

史器必依禮服無舛法凡蓋負象天軫方法地

上無二天之儀下設兩蓋之飾求之志錄恐爲乖衷又假爲麟首加乎馬頭事不師古鮮或可施建武中明帝乃省重蓋等

金輅

制度校飾如玉輅而稍減少亦以金塗

象輅

如金輅而制飾又減

木輅

制飾如象輅而尤減

革輅

如大輅

建大麾

赤旗也首施火燄幡

宋昇明三年錫齊王大輅戎輅各二乘黃五輅無大輅戎輅左丞王遂之議大輅躬之祭車故不登

周輅之名而明堂位云大輅殷輅也注云大輅
木輅也月令中央土乘大輅注云殷輅也禮器
大輅繁纓一就注云大輅殷之祭天車也周禮
五路玉路金路象路革路木路則周之木輅殷
之大路也周革路建大白以即戎此則戎路也
意謂國之大事在祀與戎故錫以殷祭天之車
與周之即戎之路祀則以殷戎必以周者明郊
天義遠建前代之禮即戎事近故以今世之制
明堂位云魯君孟春乘大路載十有二旒日月

之章祀于帝郊天必以大輅以錫諸侯良有以也今木路即大路也太尉左長史王儉議宜用金輅九旒時乘黃無副借用五輅大朝臨軒權列三輅

王金輅建碧旂象木輅建赤旂永明初太子步兵校尉伏曼容議以爲齊德尚青五路五牛及五色幡旗竝宜以先青爲次軍容戎事之所乘犧牲繭握之所薦竝宜悉依尚色三代服色以姓音爲尚漢不識音故還尚其行運之色今旣

無善律則大齊所尚亦宜依漢道若有善吹律者便應還取姓尚太子僕周顒議三代姓音古無前記載音配尚起自曼容則是曼容善識姓聲不復方假吹律何故能識遠代之宮商而更迷皇朝之律呂而玄當今無知吹律以定所尚宜附漢以從闕邪皇朝本以行運爲所尚非關不定於音氏如此設有善律之知音不宜遵聲以爲尚散騎常侍劉昞之等十五人竝議駁之事不行

皇太子象輅

枝飾如御旂九旒降龍

皇太后皇后重翟車

金塗枝具白地人馬錦帖廂隱膝後戶白牙的帖金塗面

釘漆畫輪鐵鐺金塗縱容後路轆師子轄抗檐皆施金塗螭頭及神龍雀等諸飾輓衡上施金博山又有

金塗長蓋

金塗瓜支子花二十八青油攸碧綃黃絃蓋漆布裏紫顏毛黃絃紫絃隨陰碧

毛外上施絳紫系絡

碧旂九旒榮戟宋元嘉東宮儀記云

中宮僕御重翟金根車未詳得稱為金根也

皇太子妃厭翟車

如重翟飾微減

指南車

四周廂上施屋指南人衣裙襦天衣在廂中上四角皆施龍子千縣唯色真孔雀

旄烏布阜復幔漆畫輪駕牛皆銅校飾

記里鼓車

制如指南上施華蓋子
縹衣漆畫鼓機皆在內

輦車

如犢車竹蓬廂外鑿鏤金薄碧紗衣織成毛
錦衣廂裏及仰項隱膝後戶金塗鏤面瑋瑁

帖金塗松精登仙花紐綠四綠四望紗萌子上下前
後眉鏤鏤轆枕長角龍白牙蘭瑋瑁金塗校飾漆郵
塵板在蘭前金銀花獸攫天龍師子鏤面掄花細指
子摩尼炎金龍虎扶轆銀口帶龍板頭龍轆輓上金
鳳皇鈴璫錄口帶星後梢瑋瑁帖金塗香沓銀星花
獸慢竿杖金塗龍牽縱橫長欄背花香染光床副自
輦以下二官御車皆綠油幢絳系絡
御所乘雙棟其公主則碧油幢云

司馬法曰夏

后氏輦曰余車殷曰胡奴車周曰轎車皆輦也

漢書叔孫通傳云皇帝輦出房成帝輦過後宮
此朝宴竝用也與服志云輦車具金銀丹青

采牐雕畫蒲陶之文乘人以行信陽侯陰就見
井丹左右人進輦是爲臣下亦得乘之晉武帝
給安平獻王孚雲母輦晉中朝又有香衣輦江
左唯御所乘

卧輦

校飾如坐輦
不甚服用

漆畫輪車

金塗校飾如輦微有減降金
塗鐙縱容後轆師子副也

御爲羣

公舉哀臨哭所乘皇后太子妃亦乘之

漆畫牽車

小形如輿車金塗縱容後路師子轆
鐵鐙錦衣廂裏隱膝後戶牙蘭轆枕

梢幘竿成棟梁
皆金塗校飾

御及皇太子所乘即古之羊車

也晉泰始中中護軍羊琇乘羊車爲司隸校尉
劉毅所奏武帝詔曰羊車雖無制非素者所服
免官衛玠傳云搃角乘羊車市人聚觀今不駕
羊猶呼牽此車者爲羊車云

輿車

形如輶車柒畫金校飾錦衣兩廂後戶隱膝
牙蘭皆瑇瑁帖刀格鏤面花釘幪竿成校棟

梁下施八欄金塗
沓北床副人舉之

一曰小輿小行幸乘之皇太子

亦得於宮內乘之

衣畫十二乘

檣榆轂輪箕子壁綠油衣廂外綠
紗萌油幢絡通幪竿刺代棟梁拙

儒真形龍牽支子花轆後
伏神抗承泥沓金塗校具

古副車之象也今亦曰

五時副車

青葫車是謂揄慢車

油絡畫安車公主王妃三公特進夫人所乘漢制皇后貴人紫罽輶車晉皇后乘雲母油畫安車駕六以兩轅安車駕五為副公主畫安車駕六以兩轅安車駕三為副公主畫安車駕三夫人青交絡安車駕三皆以紫絡罽輶車駕三為副九嬪世婦輶車駕二王公妃特進夫人皐交絡為副漢賤輶車而貴輶車晉賤輶輶而貴

輅車皆行禮所乘

黃屋車建碧旂九旒

九旒鷹輅也漢輿服志云金根車蓋黃繒爲裏謂之黃屋

今金玉輅皆以黃地錦唯此車以黃繒皆金塗校具黃隱隨陰青毛羽二十八瓜支子花絳系絡九

命上公所乘

青蓋安車朱轡漆班輪駕一左右駢通幪車爲

副諸王禮行所乘凡車有轡者謂之軒阜蓋安

車朱轡漆班輪駕一通幪牛車爲副三公禮行

所乘

安車黑耳阜蓋馬車朱轡駕牛車爲副國公

列侯禮行所乘

馬車駕一九卿領護二衛驍游四軍五校從郊
陵所乘晉制三公下至九卿又各安車黑耳一
乘公駕三特進駕二卿駕一復各輶車施黑耳
後戶阜輪一乘

油絡輶車尚書令僕射中書監令尚書侍中常
侍中黃門中書散騎侍郎皆駕一牛朝直所乘
晉制尚書令施黑耳後戶阜輪僕射中書監令
直施後戶阜輪尚書無後戶皆漆輪轂今猶然

安車赤屏駕一又輶車施後尸為副太子二傳
禮行所乘

四望車

通幘油幢絡班朱輪轂

亦曰阜輪以加禮貴臣晉武

詔給魏舒陽燧四望小車

三望車

制度如四望

或謂之夾望亦以加禮貴臣次

四望

油幢絡車

制似三望而減

王公加禮者之為常乘次三望

平乘車

竹箕子壁仰檣榆為輪通幘竿刺代棟梁拙樗真形龍牽金塗支子花細轆頭後梢

皆伏神承泥庶人亦然但不通幘

三公諸王所乘自四望至平乘

皆銅校飾

輶輶車

四輪飾如金根四角龍首施組銜壁垂五采析羽葆流蘇前後雲氣錯畫帷裳以素

爲池而黼黻駕四白駱馬太僕執轡貴臣薨亦如之羽飾駕御微有減降

虞書曰予欲觀古人之象日月星辰山龍華蟲

作績宗彝藻火粉米黼黻絺繡以五采章施于

五色天子服備日月以下公山龍以下侯伯華

蟲以下子男藻火以下卿大夫粉米以下天子

六冕王后六服著在周官公侯以下咸有名則

佩玉組綬竝具禮文後代沿革見漢志晉服制

令其冠十二品見蔡邕獨斷並不復具詳宋明
帝太始四年更制五輅議脩五冕朝會饗獵各
有所服事見宋注舊相承三公以下冕七旒青
玉珠卿大夫以下五旒黑玉珠永明六年太常
丞何譔之議案周禮命數改三公八旒卿六旒
尚書令王儉議依漢三公服山龍九章卿華蟲
七章從之

平冕黑介幘今謂平天冠皐表朱緣裏廣七尺
長尺二寸垂珠十二旒以朱組爲纓如其綬色

衣阜上絳下裳前三幅後四幅衣畫而裳繡爲
日月星辰山龍華蟲藻火粉米黼黻十二章素
帶廣四寸朱裏以朱綠裨飾其側要中以朱垂
以綠垂三尺中衣以絳緣其領袖赤皮韎絳袴袜
赤舄郊廟臨朝所服也漢世嘗免用白玉珠爲旒
魏明帝好婦人飾改以珊瑚珠晉初仍舊後乃
改江左以美玉難得遂用瑋珠世謂之白琰珠
袞衣漢世出陳留襄邑所織宋末用繡及織成
建武中明帝以織成重乃采畫爲之加飾金銀

薄世亦謂爲天衣

史臣曰黼黻之設經緯爲用故五色六章十二衣還相爲質也歷代龍袞織以成文今體不勝衣變易舊法豈致美黻冕之謂乎

通天冠黑介幘金博山顏絳紗袍皁緣中衣乘輿常朝所服舊用駁犀簪導東昏改用玉其朝服臣下皆同

黑介幘單衣無定色乘輿拜陵所服其白幘單衣謂之素服以舉哀臨喪

遠游冠太子諸王所冠太子朱纓翠羽綏珠節
諸王玄纓公侯皆同

平冕各以組爲纓王公八旒衣山龍九章卿七
旒衣華蟲七章竝助祭所服皆畫皂絳繒爲之
進賢冠諸開國公侯鄉亭侯卿大夫尚書關內
侯二千石博士中書郎丞郎祕書監丞郎太子
中舍人洗馬舍人諸府長史卿尹丞下至六百
石令長小吏以三梁二梁一梁爲差事見晉令
武冠待臣加貂蟬餘軍校武職黃門散騎太子

中庶子二率朝散都尉皆冠之唯武騎虎賁服
文衣插雉尾於武冠上

史臣曰應劭漢官釋附蟬及司馬彪志並不見侍
中與常侍有異唯言左右珥貂而已案項氏說
云漢侍中蟬刻爲蟬像常侍但爲璫而不蟬未
詳何代所改也

法冠廷尉等諸執法者冠之

高山冠謁者冠之

樊噲冠殿門衛士冠之

黑介幘冠文冠平幘冠武冠尚書令僕射尚書
納言幘後飾爲異

童子空頂幘施假髻貴賤同服

救日蝕文武官皆免冠著赤介幘對朝服赤幘
示威武也

袴褶車駕親戎中外纂嚴所服黑冠帽綴紫標
以絳帶代鞶帶中官紫標外官絳標其纂嚴戎
服不綴標行留悉同校獵巡幸從官戎服革帶
鞶帶文官不纓武官脫冠

桂襦大衣謂之褱衣皇后謁廟所服公主會見
大首髻其燕服則施嚴雜寶爲佩瑞桂襦用繡
爲衣裳加五色鏤金銀校飾

綬乘輿黃赤綬黃赤縹紺五采太子朱綬諸
王纁朱綬皆赤黃縹紺四采妃六同相國綠綬
綬三采綠紫紺郡公玄朱侯伯青朱子男素朱
皆三采公世子紫侯世子青鄉亭關內侯墨綬
皆三采郡國太守內史青尚書令僕中書監令
祕書監皆黑丞皆黃諸府丞亦黃皇后與乘輿

同赤貴嬪夫人貴人紫王太妃長公主封君亦
紫綬六宮青綬青白紅郡公侯夫人青綬

乘輿傳國璽秦璽也晉中原亂沒胡江左初無
之北方人呼晉家爲白板天子冉閔敗璽還南
別有行信等六璽皆金爲之亦秦漢之制也皇
后金璽太子諸王金璽皆龜鈕公侯五等金章
公世子金印侯銀印貴嬪夫人金章公主王太
妃封君金印六宮以下公侯太夫人夫人銀印
其公將軍金章光祿大夫卿尹太子傳諸領護將

軍中郎將校書郡國太守內史四品五品將軍
皆銀章尚書令僕中書監令祕書丞太子二率
諸府長史卿尹丞尉中丞都水使者諸州刺史
皆銅印

三臺五省二品文官皆簪白筆王公五等及武
官不簪加內侍乃簪

百官執手板尚書令僕尚書手板頭復有白筆
以紫皮裹之名曰笏漢末仲長統謂百司皆宜
執之其肩上紫袷囊名曰契囊世呼爲紫荷

佩玉自乘輿以下與晉宋制同建元四年制王公侯卿尹珠水精其餘用牙蚌太官宰人服離支衣後定

贊曰文物煌煌儀品穆穆分別禮數莫過輿服

南齊志第九

南齊書十七

漆畫索車注成棟梁一本或作戈興車注成板
棟梁一本成校作戈杖衣書注刺代棟梁平
乘車注刺代棟梁並疑

志第十

南齊書卷第十

臣蕭

此古字關

祥瑞

天祿瑞命遐哉邈矣靈篇祕圖固以蘊金匱而
充石室炳契決陳緯候者方策未書啓覺天人
之期扶獎帝王之運三五聖業神明大寶二謀
協贊罔不由茲夫流火赤雀實紀周祚雕雲素
靈發祥漢氏光武中興皇符爲盛魏膺當塗之
讖晉有石瑞之文史筆所詳亦唯舊矣齊氏受

命事殷前典黃門郎蘇侃撰聖皇瑞應記永明
中庾溫撰瑞應圖其餘衆品史注所載今詳錄
去取以爲志云

老子河洛讖曰年曆七七水滅緒風雲俱起龍
麟舉宋水德王義熙十四年元熙二年永初三
年景平一年元嘉三十年孝建三年大明八年
永光一年泰始七年泰豫元年元徽四年昇明
三年凡七十七年故曰七七也易曰雲從龍風從
虎關尹云龍不知其乘風雲而上天也

識又曰蕭草成道德懷書備出身形法治吳出
南京上即姓諱也南京南徐州治京口也

識又曰墮場河梁塞龍淵消除水災泄山川墮
場河梁爲路也路即道也淵塞者譬路成也即
太祖諱也消水災言除宋氏患難也

識又曰上參南斗第一星下立草屋爲紫庭神
龍之崗梧桐生鳳鳥舒翼翔且鳴南斗第一星
吳分也草屋蕭字也又蕭管之器像鳳鳥翼也
識又曰蕭爲三士天下大樂三士主字也

識又曰天子何在草中宿宿肅也

尚書中候儀明篇曰仁人傑出握表之象曰角
姓合音之于蘇偁云蕭角姓也又八音之器有簫
管也

史臣曰案晉光祿大夫何植解音之于爲曹字
謂魏氏也王隱晉書云卯金音于亦爲魏也侯
書章句本無銓序二家所稱既有前釋未詳偁
言爲何推據

孝經鉤命決曰誰者起視名將君者羣也理物

爲雄優劣相次以期興將太祖小諱也征西將軍蕭思話見之曰此我家諱也

王子年歌曰金刀治世後遂苦帝王昏亂天神怒災異屢見戒人主三分二叛失州土三王九江一在吳餘悉稚小早少孤一國二主天所驅金刀劉也三分二叛宋明帝世也三王九江者孝武於九江興晉安王子勛雖不終亦稱大號後世祖又於九江基霸迹此三王也一在吳謂齊氏桑梓亦寄治南吳也一國二主謂太祖符

運潛興爲宋氏驅除寇難

歌又曰三禾摻摻林茂孳金刀利刃齊刈之刈
翦也詩云實始翦商

歌又曰欲知其姓草蕭蕭穀中最細低頭熟鱗
身甲體永興福穀道熟成又諱也太祖體有龍
鱗斑駁成文始謂是黑歷治之甚至而文愈明
伏羲亦鱗身也

金雄記曰鑠金作刀在龍里占睡上人相須起
又云當復有作蕭入草蕭字也易云聖人作之

記又去草門可憐乃當悴建號不成易運沸詩
去不時時也不成成也建號建元號也易運革
命也

讖曰周文王受命千五百歲河雒出聖人受命
於己未至丙子爲十八周旅布六郡東南隅四國
安定可久留案周滅殷後七百八十年秦四十九
年漢四百二十五年魏四十五年晉百五十年宋
六十年至建元元年千五百九年也武進縣彭山
舊臺在焉其山崗阜相屬數百里上有五色雲氣

有龍出焉宋明帝惡之遣相墓工高靈文占視
靈文先與世祖善還詭荅云不過方伯退謂世
祖曰貴不可言帝意不已遣人於墓左右校獵
以大鐵釘長五六尺釘墓四維以爲厭勝太祖
後改樹表柱柱忽龍鳴響震山谷父老咸志之云
會稽剡縣刻石山相傳爲名不知文字所在昇
明末縣民兒襲祖行獵忽見石上有文凡三處
荅生其上字不可識刊荅去之大石文曰此齊
者黃公之化氣也立石文曰黃天星姓蕭字某

甲得賢帥天下太平小石文曰刻石者誰會稽
南山李斯刻秦望之封也

益州齊后山父老相傳其名亦不知所起昇明
三年有沙門玄暢於山丘立精舍其曰太祖受
禪日也

嵩高山昇明三年四月滎陽人於山東南澗見
天雨石墜地石開有璽在其中方三寸其文曰
戊丁之人與道俱肅然入草應天符又曰皇帝
興運午詣雍州刺史蕭蕭赤斧表獻之

史臣案昔大人見臨洮而銅人鑄臨洮生董卓而銅人毀有卓而世亂世亂而卓亡如有似也晉末嵩高山出玉壁三十二宋氏以爲受命之祥今此山出璽而水德玄謝終始之徵亦有領也元徽四年太祖從南郊望氣者陳安寶見太祖身上黃紫氣屬天安寶謂親人王洪範曰我少來未嘗見軍上有如此氣也太祖年十七夢乘青龍西行逐日日將薄山乃止覺而恐懼家人問占者云至貴之象也蘇偁云青木色日暮者

宋氏末運也

泰始七年明帝遣前淮南太守孫奉伯往淮陰
監元會奉伯與太祖同寢夢上乘龍上天於下
捉龍脚不得覺謂太祖曰兗州當大庇生民弟
不見也奉伯卒於宋

清河崔靈運爲上府參軍夢天帝謂已曰蕭諱
是我弟十九子我去年已授其天子位自三皇
五帝至齊受命君凡十九人也

宋泰始中童謡云東城出天子故明帝殺建安

王休仁蘇侃去後從帝自東城即位論者謂應之乃是武進縣上所居東城里也能襄去上舊鄉有大道相傳去秦始皇所經呼爲天子路後遂爲帝鄉焉案從帝實當援立猶如晉之懷愍亦有徵符齊運旣無巡幸路名或是秦舊疑不能詳

世祖年十三夢舉體生毛髮生至足又夢人指上所踐地曰周文王之田又夢虛空中飛又夢著孔雀羽衣庾溫去雀爵位也又夢鳳皇從天飛

下青溪宅齋前兩翅相去十餘丈翼下有紫雲
氣及在襄陽夢著桑屐行度太極殿階庾溫云
屐者運應木也臣案桑字爲四十而二點世祖
年過此即帝位謂著屐爲木行也屐有兩齒有
聲是爲明兩之齒至四十二而行即眞矣及在郢
州夢人從天飛下頭挿筆來畫上衣兩邊不言
而去庾溫釋云畫者山龍華蟲也

世祖宋元嘉十七年六月己未夜生無火婢吹
灰而火自燃

世祖於南康郡內作伎有絃無管於是空中有
箎聲調節相應

世祖爲廣興相嶺下積旱水涸不通船上部伍
至水忽暴長庾溫去易利涉大川之義也

世祖頓盆城城內無水欲鑿引江流試掘井得
伏泉九處皆湧出建元元年四月有司奏延陵
令戴景度稱所領季子廟舊有涌井其所廟祝
列古舊井北忽聞金石聲即掘深三尺得沸泉
其東忽有聲錚錚又掘得泉沸湧若浪泉中得

一銀木簡長一尺廣二寸隱起文曰廬山道人
張陵再拜謁詣起居簡木堅白而字色黃謹案
瑞應圖浪井不鑿自成王者清靜則仙人主之
孔氏世錄云叶精帝道孔書明巧當在張陵宋
均注云張陵佐封禪一云陵仙人也

元徽三年太祖在清溪宅齋前池中忽揚波起
浪湧水如山有金石響須臾有青龍從地中出
左右皆見之

昇明元年青龍見齊郡

建元四年青龍見從陽郡清水縣平泉湖中

永明七年黃龍見曲江縣黃池中一宿二日

中興二年山上雲障四塞頃有玄黃五色如龍
長十餘丈從西北升天

宋泰始末武進舊坐有獸見一角羊頭龍翼馬
足父老咸見莫之識也

永明十年鄱陽郡獻角獸麟首鹿形龍鸞共
色瑞應圖云天子萬福允集則角獸至

十年白象九頭見武昌

史臣日記云外中于天麟鳳至而龜龍格則鳳
皇巢乎阿閣麒麟在乎郊藪豈非馴之在庭擾
以成畜其爲瑞也如此今觀魏晉已來世稱靈
物不少而亂多治少史不絕書故知來儀在沼遠
非前事見而不至未辨其爲祥也

昇明三年三月白虎見歷陽龍亢縣新昌村新
昌村嘉名也瑞應圖云王者不暴白虎仁
建元四年三月白虎見安蠻虔化縣

中興二年二月白虎見東平壽張安樂村

昇明二年騶虞見安東縣五界山師子頭虎身
龍脚詩傳云騶虞義獸白虎黑文不食生物至
德則出

昇明三年太祖爲齊王白毛龜見東府城池中
建元二年休安陵獲玄龜一頭

永明五年武騎常侍唐潛上青毛神龜一頭

七年六月彭城郡田中獲青毛龜一頭

八年延陵縣前澤畔獲毫龜一枚

八年四月長山縣王惠獲六目龜一頭腹下有

萬歡字并有卦兆

六月建城縣昌城田獲四目龜一頭下有萬齊字
九年五月長山縣獲神龜一頭腹下有巽兌卦
中興二年正月邏將潘道蓋於山石穴中獲毛
龜一頭

昇明三年世祖遣人詣宮亭湖廟還福船泊渚
有白魚雙躍入船

永明五年南豫州刺史建安王子真表獻金色
魚一頭

建元元年八月男子王約獲白雀一頭

九月秣陵縣獲白雀一頭

二年四月白雀集郢州府館

五月白雀見會稽永興縣

永明元年五月郢州丁坡屯獲白雀一頭

三年七月安城王高第獲白雀一頭

九月南郡江陵縣獲白雀一頭

四月七日白雀見臨汝縣

七年六月鹽官縣獲白雀一頭

八年天門臨澧縣獲白雀一頭

九年七月吳郡錢塘縣獲白雀一頭

八月豫州獲白雀一頭

十年五月齊郡獲白雀一頭

建元元年五月白鳥見巴郡

永明四年三月三足鳥巢南安中陶縣庭

八年四月陽羨縣獲白鳥一頭

隆昌元年四月陽羨縣獲白鳥一頭

建元二年江陵縣獲白鼠一頭

永明六年白鼠見芳林園

十年九月義陽郡獲白鼠一頭

永明四年丹楊縣獲白兔一頭

昇明元年六月慶雲見益都

建元元年世祖拜皇太子日有慶雲在日邊

三年華林園醴泉堂東忽有瑞雲周圍十許丈
高下與景雲樓平五色藻密光彩映山徘徊良
久行轉南行過長船入華池

昇明二年宣城臨成縣於藉山獲紫芝一枝

永明八年五月陽城縣獲紫芝一株

隆昌元年正月襄陽縣獲紫芝一莖

昇明二年四月昌國縣徐萬年門下棠樹連理
九月豫州萬歲澗廣數丈有樹連理隔澗騰枝
相通越壑跨水爲一幹

建元二年九月有司奏上虞縣楓樹連理兩根
相去九尺雙株均聳去地九尺合成一幹

故鄣縣楓樹連理兩株相去七尺大八圍去地
一丈仍相合爲樹泯如一木

山陽縣界若邪村有一槻木合爲連理

淮陰縣建業寺梨樹連理

建康縣梨樹耀攘

一本作耀攘

五圍連理六枝

永明元年五月木連理生安成新喻縣又生南

梁陳縣閏月璿明殿外閣南槐樹連理

八月鹽官縣內樂村木連理

二年七月烏程縣陳文則家槿樹連理

七月新治縣槐栗二木合生異根連理去地數

尺中央小開上復爲一

三年正月安城縣榆樹二株連理

二月安陽縣梓樹連理

九月句陽縣之穀山槿樹連理異根雙挺共杪
爲一

十二月永寧左郡楠木連理

四年二月秣陵縣高天明園中李樹連理生高三尺五寸兩枝別生復高三尺合爲一幹

五年正月秣陵縣華僧秀園中四樹連理

六年四月江寧縣北界賴鄉齊平里三成邏門

外路東太常蕭惠基園榦樹二株連理其高相
去二尺南大北小小者傾柯南附合爲一樹枝
葉繁茂圓密如蓋

七年江寧縣李樹二株連理兩根相去一丈五尺
八年巴陵郡樹連理四株

三月武陵白沙戍槐木連理相去五尺俱高三
尺東西二枝合而通柯

十二月柴桑縣陶委天家樹連理

永明五年山陰縣孔廣家園榦樹二層會稽

太守隨王子隆獻之種芳林園鳳光殿西

九年秣陵縣闕場里安明寺有古樹衆僧改架
屋宇伐以爲薪剖樹木裏自然有法大德三字
始興郡本無欖樹調味有闕世祖在郡堂屋後
忽生一株

昇明二年十月甘露降建康縣

十一月甘露降長山縣

十二月甘露降彭山松樹至九日止

建元元年九月甘露降淮南郡桃石榴二樹有

司奏甘露降新汲縣王安世園樹

永明二年四月甘露降南郡桐樹

四年二月甘露降臨湘縣李樹

三月甘露降南郡桐樹

四月甘露降睢陽縣桃樹

五年四月甘露降荊州府中閣外桐樹

六年甘露降芳林園故山堂桐樹

九年八月甘露降上定林寺佛堂庭中天如雨
遍地如雪其氣芳其味甘耀日舞風至晡乃止

爾後頻降鍾山松樹四十餘日乃止

十月甘露降大安陵樹

中興二年三月甘露降茅山彌漫數里

元徽四年三月醴泉出昌國白鹿山其味甚甘

永明元年正月新蔡郡固始縣獲嘉禾一莖五穗

八月新蔡縣獲嘉禾二莖九穗一莖七穗

十一月固始縣獲嘉禾一莖九穗

二年八月梁郡睢陽縣界野田中獲嘉禾一莖

二十三穗

五年九月莒縣獲嘉禾一株

十年六月海陵齊昌縣獲嘉禾一莖六穗

十一年九月睢陽縣田中獲嘉禾一株

昇明二年九月建寧縣建昌村民採藥於萬歲山忽聞澗中有異響得銅鍾一枚長二尺一寸邊有古字

建元元年十月涪陵郡蠻民田健所住巖間常留雲氣有聲響激若龍吟求之積歲莫有見者去四月二十七日巖數里夜忽有雙光至明

往獲古鍾一枚又有一器名淳于瑱人以為神物奉祠之

永明四年四月東昌縣山自比歲以來恒發異響去二月十五日有一巖褫落縣民方元泰往視於巖下得古鍾一枚

五年三月豫寧縣長崗山獲神鍾一枚

九年十一月寧蜀廣漢縣田所墾地入尺四寸獲古鍾一枚形高三尺八寸圍四尺七寸縣柄長一尺二寸合高五尺四面各九孔更於陶所瓦

聞見有白光窺尋無物自後夜夜輒復有
光既經旬日村民張慶宣瓦作屋又於屋間
見光照內外慶宣疑之以告孔休先乃共發
視獲玉璽一鈕壁方八分上有臯文曰帝真
曲阿縣民黃慶宅左有園園東南廣袤四丈每
種菜輒鮮異雖加採拔隨復更生夜中恒有白
光皎質屬天狀似縣綃私疑非常請師卜候道
士傅德占使掘之深三尺獲玉印一鈕文曰長
承萬福

永明二年正月冠軍將軍周普孫於石頭北廂
將堂見地有異光照城堞往獲玉璽一鈕方七
分文曰明玄君

十一月虜國民齊祥歸入靈丘關聞殷然有聲
仰視之見山側有紫氣如雲衆鳥回翔其間祥
往氣所獲璽方寸四分數鈕文曰坤維聖帝永
昌送與虜太后師道人惠度欲獻虜主惠度覩
其文竊謂當今夜冠正朔在於齊國遂附道人
惠藏送京師因羽林監崔士亮獻之

三年七月始興郡民龔玄宣云去年二月忽有
一道人乞食因探懷中出篆書真經一卷六紙
又表北極一紙又移付羅漢居士一紙云從堯
率天宮下使送上天子因失道人所在今年正
月玄宣又稱神人授皇帝璽龜形長五寸廣二
寸厚二寸五分上有天地字中央蕭字下萬世
字十年蘭陵民齊伯生於六合山獲金璽一鈕
文曰年予主

世祖治盆城得五尺刀一十口永明年曆之數

昇明三年左里村人於宮亭湖得靛戟二枚傍有古字文遠不可識

泰始中世祖於青溪宅得錢一枚文有北斗七星雙節又有人形帶劍及治盆城又得一大錢文曰太平百歲

永明七年齊興太守劉元寶治郡城於塹中獲錢百萬形極大以獻臺為瑞世祖班賜朝臣以下各有差

十年齊安郡民王攝掘地得四文大錢一萬二

千七百十枚品製如一

建元元年郢州監利縣天井湖水色忽澄清出
綿百姓採以爲繡

永明二年護軍府門外桑樹一株竝有蠶絲綿
被枝莖

史臣案漢光武時有野蠶成繭百姓得以成衣
服今則浮波幕樹其亦此之類乎

永明八年始興郡昌樂村獲白鳩一頭

二年彭澤縣獲白雉一頭

七年鬱林獲白雉一頭

十年青州涇液戍獲白雉一頭

五年望蔡縣獲白鹿一頭

九年臨湘獲白鹿一頭

六年蒲壽縣亮野村獲白麋一頭

七年荊州獲白麋一頭

八年餘干縣獲白麋一頭

九年義陽安昌縣獲白麋一頭

十年司州清澂戍獲白麋一頭

十一年廣陵海陵縣獲白麋一頭

七年越州獻白珠自然作思惟佛像長三十上
起禪靈寺置刹下

七年吳郡太守江敷於錢塘縣獲蒼玉璧一枚
以獻

七年主書朱靈讓於浙江得靈石十人舉乃起
在水深三尺而浮世祖親投于天淵池試之刻
爲佛像

二年從陽丹水縣山下得古鼎一枚

三年越州南高涼俚人海中網魚獲銅獸一頭
銘曰作寶鼎齊臣萬年子孫承寶

贊曰天降地出星見先吉造物百品詳之載述

志第十

南齊書十八

志第十一

南齊書十九

臣蕭

子顯

撰

五行

宋傳曰東方易經地上之木爲觀故木於人威儀容貌也木者春生氣之始農之本也無奪農時使民歲不過三日行什一之稅無貪欲之謀則木氣從如人君失威儀逆木行田獵馳騁不反宮室飲食沈湎不顧禮制出入無度多發繇役以奪民時作爲姦詐以奪民財則木失其性

矣蓋以工匠之爲輪矢者多傷敗故曰木不曲
直宋泰豫元年京師祗垣寺皂莢樹枯死昇明
末忽更生花葉京房易傳曰樹枯冬生不出二
年國喪君子亡其占同宋氏禪位

建元元年朱爵舫華表柱生枝葉

建元初李子生毛

二年武陵沅頭都尉治有桑樹方冬生葉京房
易傳曰木冬生花天下有喪其占同後二年宮
車晏駕

四年巴州城西古樓脚栢柱數百年忽生花
永明六年後子崗栢木長二尺四寸廣四寸半
化爲石時里駕數游幸應本傳木失其性也

永明中大舩一舶無故自沈艚中無水

隆昌元年廬陵王子卿齋屋梁柱際無故出血
建武初始安王遙光治廟東安寺屋以直廟
垣截梁水出如淚

貌傳曰失威儀之制怠慢驕恣謂之狂則不肅
矣下不敬則上無威天下既不敬又肆其驕恣

肆之則不從夫不敬其君不從其政則陰氣勝
故曰厥罰常雨

永明八年四月己巳起陰雨晝或輟晴夜時見
星月連雨積霖至十七日乃止

十一年四月辛巳朔去三日戊寅起而其間輟
時晴從四月一日又陰雨晝或見日夜乍見月
回復陰雨至七月乃止

永泰元年十二月二十九日雨至永元元年五
月二十一日乃晴京房占曰冬雨天下饑春雨

有小兵時虜寇雍州餘應本傳

傳曰大雨雪猶庶徵之常雨也然有甚焉兩陰
大雨雪者陰之畜積甚也一曰與大水同象曰
攻爲雪耳

建元二年閏月己丑雨雪

三年十一月雨雪或陰或晦八十餘日至四年
二月乃止

傳曰雷於天地爲長子以其首長萬物與之出
入故雷出萬物出雷入萬物入夫雷者人君之

象入則除害出則興利雷之微氣以正月出其
有聲者以二月出以八月入其餘微者以九月
入冬三月雷無出者若是陽不開陰則出涉危
難而害萬物也

建元元年十月壬午夜電光因雷鳴

十月庚戌電光有頃雷鳴久而止

永明五年正月戊申夜西北雷聲

六年十月甲申夜陰細雨始聞雷鳴於西北上

七年正月甲子夜陰雷鳴西南坤宮隆隆一聲

而止

八年正月庚戌夜雷起坎宮水門其音隆隆一聲而止

九年二月丙子西北有電光因聞雷聲隆隆仍續十聲而止

十年二月庚戌夜南方有電光因聞雷聲隆隆相續丁亥止

十年庚子雷雷起西北

十一月丁丑西南有光因聞雷聲隱隱再聲而

止西南坤宮

十二月甲申陰雨有電光因聞西南及西北上雷鳴頻續三聲

丙申夜聞西北上雷頻續二聲

辛亥雷雨

傳曰雨電君臣之象也陽之氣專爲電陰之氣專爲霰陽專而陰脅之陰盛而陽薄之電者陰薄陽之象也霰者陽脅陰之符也春秋不書霰者猶月蝕也

建元四年五月戊午朔雹

永明元年九月乙丑雹落大如蒜子須臾乃止
十一年四月辛亥雹落大如蒜子須臾滅

貌傳又曰上失節而狂下怠慢而不敬上下失
道輕法侵制不顧君上因以荐飢貌氣毀故有
雞斃一曰水歲雞多死及爲怪亦是也上下不
相信大臣姦宄民爲寇盜故曰厥極惡一曰民
多被刑或形貌醜惡風俗狂慢變節易度則爲
輕剽竒怪之服故曰時則有服妖

永明中宮內服用射獵錦文爲騎射兵戈之象
至建武初虜大爲寇

永明中蕭詵開博風帽後裘之製爲破後帽世
祖崩後詵建廢立誅滅諸王

永明末民間制倚勸帽及海陵廢明帝之立勸
進之事倚立可待也

建武中帽裘覆頂東昏時以爲裘應在下而今
在上不祥斷之羣下反上之象也

永元中東昏侯自造遊宴之服綴以花朵錦繡

難得詳也羣小又造四種帽帽因勢爲名一曰
山鵲歸林者詩云鵲巢夫人之德東昏寵嬖淫
亂故鵲歸其林數二曰兔子度坑天意言天下
將有逐兔之事也三曰反縛黃離嘸黃口小鳥
也反縛面縛之應也四曰鳳皇度三橋鳳王者
嘉瑞三橋梁王宅處也

貌傳又曰危亂端見則天地之異生木者青故
曰青眚爲惡祥凡貌傷者金沴木木沴金衝氣
相通

延興元年海陵王初立文惠太子冢上有物如人長數丈青色直上天有聲如雷

火南方揚光輝出炎爚爲明者也人君向明而治蓋取其象以知人爲分讒佞旣遠羣賢在位則爲明而火氣從矣人君疑惑棄法律不誅讒邪則讒口行內閒骨肉外踈忠臣至殺世子逐功臣以妾爲妻則火失其性上災宗廟下災府榭內燬本朝外燬闕觀雖興師衆不能救也

永明三年正月甲夜西北有野火光上生精西

北有四東北有一竝長七八尺黃赤色

三月庚午丙夜北面有野火光上生精長六尺
戊夜又有一枚長五尺竝黃赤色

四年正月丁亥夜有火精三處

閏月丁巳夜有火精四所

十二月辛酉夜東南有野火精二枚

五年十二月丙寅夜西北有野火火上生精一
枚長三尺黃白色

六年十一月戊申夜西南及北三面有野火火

上生精九枚竝長二尺黃赤色

九年二月丙寅甲夜北面有野火火火生精二枚西北又一枚竝長三尺須臾消

求元二年八月宮內火燒西齋璿儀殿及昭陽顯陽等殿北至華林牆西及祕閣凡屋三千餘間京房易傳曰君不思道厥妖火燒宮祕閣與春秋宣榭火同天意若曰旣無紀綱何用典文爲也

二年冬京師民間相驚云當行火災南岸人家

往往於籬間得布火纏者云公家以此禳之
三年正月豫章郡天火燒三千餘家京房易占
曰天火下燒民屋是謂亂治殺兵作是年臺軍
與義師偏衆相攻於南江諸郡

三年二月乾和殿西廂火燒屋三十間是時西
齋旣火帝徙居東齋高宗所住殿也與燒宮占
同

傳又曰犯上者不誅則草犯霜而不死或殺不
以時事在殺生失柄故曰草妖也一曰草妖者

失衆之象也

永元中御刀黃文濟家齋前種昌蒲忽生花光
影照壁成五采其兒見之餘人不見也少時文
濟被殺

劉歆視傳有羽蟲之孽謂鷄禍也班固案易鷄
屬巽今以羽蟲之孽類是也依歆說附視傳云
建武二年有大鳥集建安形如水犢子其年郡
大水

三年大鳥集東陽郡太守沈約表云鳥身備五

采赤色居多案樂緯叶圖徵云焦朋鳥質赤至則水之感也

永明二年四月鳥巢內殿東鵠尾

三年大鳥集會稽上虞其年縣大水

傳曰維水沴火又曰赤青赤祥

建武四年王晏子德元所居帷屏無故有血灑之少日而散

思心傳曰心者土之象也思心不審其過在瞽亂失紀風於陽則爲陰於陰則爲大臣之象專

恣而氣盛故罰常風心爲五事主猶土爲五行主也一曰陰陽相薄偏氣陽多爲風其甚也常風陰氣多者陰而不雨其甚也常陰一曰風宵起而晝晦以應常陰同象也

建元元年十一月庚戌風夜暴起雲雷合冥從戌亥上來

四年十一月甲寅酉時風起小駛至二更雪落風轉浪津

永明四年二月丙寅巳時風迅急

十一月己丑戌時風迅急從西北戌亥上來
五年五月乙酉子時風迅急從西北戌亥上來
七年正月丁卯陽徵陰賊之日時加子風起迅
急從北方子丑上來暴疾浪津寅時止

八年六月乙酉加子時風起迅急暴疾浪律發
屋折木塵沙從西南未上來因雷雨須臾風微
雨止

九年七月甲寅陽羽廉貞之日時加亥風起迅
急從東方來暴疾彭勃浪津至乙卯陰賊時漸

微名羽動羽

九月乙丑時加未雷驟雨風起迅急暴疾浪津
從西北戍上來

十月壬辰陽羽姦邪之日時加丑風起從北方
子丑上來暴疾浪津迅急塵埃五日寅時漸微
名羽動宮

十年正月辛巳陽商寬大之日時加寅風從西
北上來暴疾浪津迅急揚沙折木酉時止

二月甲辰陽微姦邪之日時加辰風起迅急從

西北亥上來暴疾彭勃浪津至酉時止

三月丁酉陽徵廉貞之日時加未風從北方子
丑上來迅急暴疾浪津戌時止

七月庚申陰角貪狼之日時加午風從東北丑
上來迅急浪津至辛酉巳時漸微

十一年二月庚寅陽角廉貞之日時加亥風從
西北亥上來迅疾浪津丑時漸微為角動角
七月甲寅陽羽廉貞之日時加巳風從東北寅
上來迅疾浪津發屋折木戌夜漸微為羽動徵

巳巳陽角寬大之日時加未風從戌上來暴疾
良久止爲角動商及宮

凡時無專忒疑是陰陽相薄

建昌元年三月乙酉未時風起浪津暴急從北
方上來應本傳稽亂

建武二年三年四年每秋七月八月輒大風三
吳尤甚發屋折木殺人京房占獄吏暴風害人
時帝嚴刻

永元元年七月十二日大風京師十圍樹及官

府居民屋皆拔倒應本傳

傳又曰山之於地君之象也山崩者君權指京陵易處世將變也陵轉爲澤貴將爲賤也

建元二年夏廬陵石陽縣長溪水衝激山麓崩長六七丈下得柱千餘口皆十圍長者一丈短者八九尺頭題有古文字不可識江淹以問王儉儉云江東不閑隸書此秦漢時柱也後年宮車晏駕世變之象也

永明二年秋始興曲江縣山崩壅底溪水成陂

京房占山崩人主惡之

傳又曰雷電所擊蓋所感也皆思心有尤之所致也

建元二年閏六月丙戌戌夜震電

四年五月五日雲電闇都雷震于樂遊安昌殿電火焚蕩盡

永明八年四月六日雷震會稽山陰恒山保林寺刹上四破電火燒塔下佛面窓戶不異也
永明中震東宮南門無所傷毀殺食官一人

十一年三月震于東齋棟崩左右密欲治繕竟陵王子良曰此豈可治留之志吾過且旌天之愛我也明年子良薨

傳又曰土氣亂者木金水火亂之

建武二年二月丁巳地震

永元元年七月地日夜十八震

九月十九日地五震

金者西方萬物既成殺氣之始也其於王事兵戎戰伐之道也王者興師動衆建立旗鼓伐旄

把鉞以誅殘賊止暴亂殺伐應義則金氣從土
冶鑄化革形成器也人君樂侵陵好攻戰貪城
邑輕百姓之命人民不安內外騷動則金失其
性蓋冶鑄不化水滯固堅故曰金不從革又曰
維木沴金

建武四年明帝出舊宮送豫章王第二女綏安
主降嬪還上輦輦上金翅無故自折落地

言傳曰言易之道西方曰允爲口人君過差無
度刑法不一敝從其重或有師旅炕陽之節若

動衆勞民是言不從人君既失衆政令不從孤
陽持治下畏君之重刑陽氣勝則旱象至故曰
厥罰常陽也

建元三年大旱時有虜寇

永明三年大旱明年唐寓之起

建武二年大旱時虜寇方盛皆動衆之應也

言傳曰下既悲苦君上之行又畏嚴刑而不敢
正言則必先發於歌謠歌謠口事也口氣逆則
惡言或有怪謠焉

宋泰始既失彭城江南始傳種消梨先時所無
百姓爭欲種植識者曰當有姓蕭而來者十餘
年齊受禪

元徽中童謡曰襄陽白銅蹄郎殺荊州兒後沈
攸之反雍州刺史張劭兒襲江陵殺沈攸之子
元琰等

永明元年元日有小人發白虎樽既醉與筆扎
不知所道直云憶高帝敕原其罪

世祖起青溪舊宮時人反之曰舊宮者窮殿也

及上崩後宮人出居之

永明初百姓歌曰白馬向城啼欲得城邊草後
句閒云陶郎來白者金色馬者兵事三年妖賊
唐寓之起言唐來勞也

世祖起禪靈寺初成百姓縱觀或曰禪者授也
靈非美名所授必不得其人後太孫立見廢也
永明中宮內坐起御食之外皆爲客食世祖以
客非家人名改呼爲別食時人以爲分別之象
少時上宴駕

文惠太子在東宮作兩頭纖纖詩後句云磊磊落落玉山崩自此長王宰相相繼薨但二宮晏駕
文惠太子作七言詩後句輒云愁和諱後果有
和帝禪位

永明中虜中童謠云黑水流北赤火入齊尋而
京師人家忽生火赤於常火熱小微貴賤爭取
以治病法以此火炙挑板七炷七日皆差敕禁
之不能斷京師有病瘳者以火炙數日而差隣
人笑曰病偶自差豈火能爲此人便覺頤間癢

明日癭還如故後梁以火德興

文惠太子起東田時人反云後必有癭童果面
太孫失位

齊宋以來民間語云擾攘建武上明帝初誅害
蕃戚京師危駭

永元元年童謠曰洋洋千里流流翼東城頭烏
馬烏皮袴三更相告訴脚跛不得起誤殺老姥
子千里流者江柘也東城遙光也遙光夜舉事
垣歷生者烏皮袴褶往奔之跛脚亦遙光老姥

子孝字之象徐孝嗣也

永元中童謡云野豬雖嗥嗥馬子空間渠不知
龍與虎飲食江南墟七九六十三廣莫人無餘
烏集傳舍頭今汝得寬休但看三八後摧折景
陽樓識者解云陳顯達屬豬崔慧景屬馬非也
東昏侯屬豬馬子未詳梁王屬龍蕭穎胄屬
虎崔慧景攻臺頓廣莫門死時年六十三烏
集傳舍即所謂瞻烏爰止于誰之屋三八二十
四起建元元年至中興二年二十四年也摧折

景陽樓亦高臺傾之意也言天下將去乃得休息也

齊宋之際民間語云和起言以和顏而爲變起也後和帝立

崔慧景圍臺城有一五色幡飛翔在雲中半日乃不見衆皆驚怪相謂曰幡者事尋當翻覆也數日而慧景敗

言傳曰言氣傷則民多口舌故有口舌之病金者白故有白青若有白爲惡祥

南齊志十一
宋昇明二年颶風起建康縣南塘里吹帛一匹
入雲風止下御路紀僧真啓太祖當宋氏禪者
其有匹夫居之

水北方冬藏萬物氣至陰也宗廟祭祀之象死
者精神放越不反者故爲之廟以收散爲之貌
以收其魂神而孝子得盡禮焉敬之至則神歆
之此則至陰之氣從則水氣從溝瀆隨而流去
不爲民害矣人君不禱祀簡宗廟廢祭祀逆天
時則霧水暴出川水逆溢壞邑軼鄉沈溺民人

故曰水不潤下

建元二年吳興義興三郡大水

二年夏丹楊吳二郡大水

四年大水

永明五年夏吳興義興水兩傷稼

六年吳興義興二郡大水

建武二年冬吳晉陵二郡水兩傷稼

永元元年七月濤人石頭漂殺緣淮居民應本
傳荊州城內有沙池常漏水蕭穎胄爲長史水

乃不漏及穎胄亡乃復竭

傳曰極陰氣動故有魚孽魚孽者常寒罰之符也
永明九年鹽官縣石浦有海魚乘潮來水退不
得去長三十餘丈黑色無鱗未死有聲如牛土
人呼爲海鰲取其肉食之

永元元年四月有大魚十二頭入會稽上虞江
大者近二十餘丈小者十餘丈一入山陰稱浦
一入永興江皆暘岸側百姓取食之

聽傳曰不聰之象見則妖生於耳以類相動故

曰有鼓妖也一曰聲厲鼓妖

永明元年十一月癸卯夜天東北有聲至戊夜
傳曰皇之不極是謂不建其咎在霧亂失聽故
厥咎霧思心之咎亦霧天者正萬物之始王者
正萬事之始失中則害天氣類相動也天者轉
於下而運於上雲者起於山而彌於天天氣動
則其象應故厥罰常陰王者失中臣下盛強而
蔽君明則雲陰亦衆多而蔽天光也

建元四年十月丙午日入後土霧勃勃如火煙

永明二年十一月己亥四面上霧入人眼鼻至
辛丑止

二年十一月丙子日出後及日入後四面土霧
勃勃如火煙

六年十一月庚戌丙夜土霧音天昏塞濃厚至
六日未時小開到甲夜仍後濃密勃勃如火煙
辛慘入人眼鼻

八年十月壬申夜土霧音天濃厚勃勃如火煙
氣入人眼鼻至九日辰時開除

九年十月丙辰晝夜恒昏霧勃勃如火煙其
氣辛慘人眼臯兼日色赤黃至四日甲夜開除
十年正月辛酉西初四面土霧勃勃如火煙其
氣辛慘人眼臯

傳曰易曰乾爲馬逆天氣馬多死故曰有馬禍
一曰馬者兵象也將有寇戎之事故馬爲怪

建昌四年王晏出至草市馬驚走鼓步從車而
歸十餘日晏誅

建武中南岸有一蘭馬走逐路上女子女子窘

急走入人家牀下避之馬終不置發牀食女子
股脚間肉都盡禁司以聞敕殺此馬是後頻有
寇賊

京房易傳曰生子三胷以上民謀其主三手以
上臣謀其主三口已上國見驚以兵三耳已上
是謂多聽國事無定三臯以上國主久病三足
三曆已上天下有兵其類甚多蓋以象占之
永明五年吳興東遷民吳休之家女人雙生三
兒胷以下齊以上合

京房易傳曰野獸入邑其邑大虛又曰野獸無故入邑朝廷門及官府中者邑逆且虛

永明中南海王子罕爲南充州刺史有驢入廣陵城投井而死又有象至廣陵是後刺史安陸王子敬於鎮被害

建武四年春當郊治丘園宿設已畢夜虎攫傷之

建武中有鹿入景皇寢廟皆爲上崩及禪代也凡無占者皆爲不應本傳

贊曰木怪夔魍火爲水妃
三才圖會載物類彙編
形聲異迹影響同歸皆由
魍魎與木類推

志第十一

南齊書十九